

文
木
山
房
集

吳敬梓文木山房集四卷，附吳娘詩詞
各一卷，我在民國十一年在北京收得，價
值一圓五角。此是中國文學史上的重要
史料，在當時為天地间僅存的孤本。故
用此集作底子，特別是集中的移家賦，參
攷金椒志，始終寫成吳敬梓年譜。

胡適

乾隆元年

朝廷法古制科取士自

世廟時

詔在廷諸臣及各省大

吏采訪博學鴻儒之

彥余司訓江寧三年無以應也

今天子卽位之元年

相國泰安趙公方巡撫安徽考取

全椒諸生吳敬梓敏軒

侍讀錢塘鄭公督學于上江交

口稱不置。旣檄行全椒取具結狀將論薦焉而敏軒病不

能就道。兩月後病愈至余齋。蓋敏軒之得受知于二公者

則又余之薦也。余察其容顏頽非託爲病辭者。因告之曰

子休矣。當子膺薦舉時余爲子筮之得井之三爻其辭曰

井渫不食爲我心恻。王明並受其福。今子學優才贍躬膺

朱希詩三

頁以

盛典遇而不遇豈非行道之人皆爲心懶者乎雖然古人不得志于今必有所傳于後吾子研究六籍之文發爲光怪俾後人收而寶之又奚讓乎歷金門上玉堂者哉且士得與于甲乙之科沾沾得意以終其身者徒以文章一月之知耳子之文受知于當代鉅公大儒雖久困草茅竊恐 廟堂珥筆之君子有不及子之著名者矣由此言之未可謂之不遇也上海唐時琳

敏軒以名家子好學詩古文辭雜體以名于世凡有所作必曲折深入橫發截出就于古人毅率規矩而始已卽于他人作一覽數行下亦能以片語領作者意旨以中其要

害江南北朋遊中余獨畏其才大眼高而心細也敏軒承家世文物聲華烜赫之後風流醞釀力洗紕綺習氣生性豁達急朋友之急不瑣瑣于周閉藏積至于今而家乏擔石之儲矣大凡貧而乍富者其志卑而瑣富而乍貧者其志卑而餒世富貴而乍貧者尤甚皆不足與議學問之事周旋之久知敏軒之心眼不爲世俗所蒙翳本于志氣之清明振作故可畏也令子煇年未弱冠手鈔十三經註疏較訂字義精嚴不少懈疎趨庭之下相爲唱和今都爲一集韓愈曰莫爲之前雖美弗彰莫爲之後雖盛弗傳君子于此觀世德矣使敏軒以其攻詩古文之心思效世人周

閉藏積亦何至如是然敏軒以其攻詩古文之心思效世之周閉藏積必將有什伯無算者大過其所爲而何止不至如是雖然豐于此者必嗇于彼敏軒又何以能承文物聲華之後父子相師友名于當世而至于如是也哉此其所以不以彼易此也余兩人有同姓之誼故質言之以敘其端會昌吳湘臯

金陵大都會人文之盛自昔艷稱之考之千古顧陸謝王皆自他郡徙居所謂避地衣冠盡向南者其所致良有由哉全椒吳子敏軒慨然卜築而居敏軒生世家羣從皆負逸才兄青然與余爲同門友余所畏也敏軒少攻聲律之

文與青然相師資而奇情勃發時角立不相下遂齊名曾
與薦鴻博以病未赴論者惜之爲諸生二十年倦而思去
要其所自樹立豈以纓組爲輕重哉余新安產而流寓金
陵者久思稍振拔以追往昔之流風餘韻固大有人在然
又念以敏軒之才必見用于世而山水之間不能不與余
以離羣之感爲可踧踖也因讀其集而志之如此上元程
廷祚

全椒吳侍讀公以順治戊戌登一甲第三人進士及第其
所爲制義衣被海內一時名公鉅卿多出其門李文貞公
其一也詩古文辭與新城王阮亭先生齊名學者翕然宗

師之尊之先人與吳氏稱世講好者近百年矣侍讀之曾
孫敏軒流寓江寧能以詩賦力追漢唐作者既不遇于時
益專精殫志久而不衰今將薄遊四方余遂捐篋中金梓
其有韻之文數十紙以贖之當代諸賢竊嘆全椒吳氏百
年以來稱極盛今雖稍遜于前並江猶比之烏衣馬糞而
敏軒之才名尤其最著者也余梓其所著匪獨愛其與余
爲同調將與天下共之焉儀徵方嶧

吳聘君敏軒流寓金陵與余衡宇相望晨夕唱酬至樂也
其詩如出水芙蓉娟秀欲滴論者稱其直過溫李而清永
潤潔又出入于李順常建之間至辭學婉而多風亦庶幾

白石玉田之流亞信可傳也余方謀付之剞劂以垂不朽而敏軒薄遊真州可村方先生愛爲同調遽損囊中金先我成此盛舉古人哉是皆可傳也江寧黃河

近代作詩多取燕遊花月爲詠而體則七律居半兼以分韻限韻次韻稱奇不知詩言志歌永言之不足而長言之長言之不足而詠歎之如必燕遊花月分題角勝將作者之精神注于聲律比偶之工不幾失詩之真面目哉本直流寓金陵二十年詩筒唱和積案盈箱其中絕無敏軒之作或疑其懶且傲旣見敏軒所存大抵皆紀事言懷登臨弔古述往思來百端交集苟無關係者不作焉庶幾步

趨乎古人母怪乎見時賢之分題角勝則備備乎謝不敏也江都李本宣

詞序

秦青往矣誰能緩節而歌咸黑杳然詎解曼聲之奏三唐以後歌詩之法無存五季而還樂句之傳盡失是以金荃蘭畹不入翠管紅牙然而寫閨穉之韻懊儂子夜之遺音據遊覽之情讀曲鳥啼之舊製青棠蠲忿消磨花月之愁紅豆記歌細釋虫魚之注是則觀毫三寸可代綽板琵琶喻糜一丸足抵玉釵羅袖總前按拍香流齒頰之間月下微吟沁入心脾之內豈有傷于大雅寧敢強爲外編吳子

敏軒夙擅文雄尤工駢體悅心研慮久稱詞苑之宗逸致
閒情復有詩餘之癖辟之蠶絲春半能遇物而牽縈葦語
秋清只自傳其辛苦更闌燭跋寫就烏絲酒暖香溫譜成
黃絹允矣才人之極致愛其情思之纏綿宗淳南國羈人
西湖逋客僧樓匿影正嚴霜苦雪之天旅館逢春又寵柳
驕花之候屬良朋之座上示我一編置麗製于袖中遲之
三歲長吟短詠逢郭璞之綵毫夢斷魂勞割邱遲之碎錦
喜今得付之剞劂悵未能被以管弦用贅瑣言恕余調語

山陰沈宗淳

文木山房集目

賦一

擬獻朝會賦 并序

正聲感人賦

繼明照四方賦

移家賦 并序

文木山房集

全椒 吳敬梓 敏軒

賦一

擬獻朝會賦 并序

臣聞舜受終於文祖輯瑞者羣后禹大會於塗山執玉者萬國周禮太宰象闕懸憲章之新漢殿未央著作歷承明之選講禮述職龍樓鶴禁之中攷績獻功金匱玉階之下凡以正班爵之義訓上下之則也

皇上握紀開階御符當壁聰明智勇商后之珠庭敦敏猷齊神農之玉理仰觀天而俯察地栗栗孜孜就如日而望

如雲巍巍蕩蕩林林兆姓咸歌

帝德之化神濟濟臣工喜觀

天顏之咫尺平章百姓表正萬邦六相五臣都俞吁咈四
門三宅亮采疇咨長治久安猶虛座而側席既富方穀仍
省賦而蠲租堯鼓舜旌盡徬徨於寤寐周輶夏磬愈懋勉
而焦勞明試以功襄贊不愆於圖事從欲以治拜颺罔愧
於質誠重譯來朝聽歡聲之雷動介圭入覲聯班序以雲
名臣早披綿蕞未列簪紳欣逢喜起之年時雍於變幸值
明良之運乃賡載歌其辭曰月在孟陬歲次柔兆

皇帝方昭受命之符登聖人之寶命典儀以領贊徵諸生

而搜討瑞烟籠鴟吻之光旭日麗龍屍之道朱宮則藹藹
以透迤丹地則耽耽而窮窈萬戶曦多重簷霧少玉花停
夜金壺送曉殷殷戴旒映宮草之霏微細細爐烟駐游絲
之繚繞凜昊天之明且兮較鷓班而尤肅問夜色之未央
兮比鷄人而更早魚鑰欲啓兮噦噦鸞聲鳳輦將駕兮晰
晰庭燎維時沙隄堂老金鉉銀青鳴珂列炬爭看火城禁
花宮漏澹月疎星上林鶯轉曉陌鷄鳴法度重尊卑明揚
旌旆盛簪纓冠蓋兮赫奕章服兮錦榮金闕曉鐘警侍臣
之待漏玉階仙仗許學士之登瀛紺練輝兮霞采霜戟照
兮春晴羽旄飛兮馳道翠華停兮璇扃衣冠香惹劍佩花

迎整齊以正八表兮共聽傳蹕之肅過密方在四海兮不
聞大樂之聲於是開閭闔之門坐太極之殿盡列龍旗纒
分雉扇日色方臨香烟徐轉玉佩鳴兮聲鏘金蟬耀兮目
眩翠烟揚兮高旌淑景輝兮雕輦才稀晝漏久與宰執以
相親有喜

天顏不使近臣之習見銀燭光添王珂采絢端拱而無爲
兮愛育黎民過化而存神兮財成赤縣宮殿兮風微階陛
兮露濺綈几兮式憑東帛兮旣薦爾乃百揆使宅五教敬
敷五流有宅五宅三居草木鳥獸疇作朕虞惟寅惟清秩
宗共圖直溫寬粟典樂是娛

天子曰咨羣臣曰都心腹兮耳目左右兮與俱山龍華蟲
兮觀垂裳之象宗彝藻火兮用作服之需五采五色兮彰
於百辟六律五聲兮振於九衢翼爲明聽臣鄰奔趨光天
之下至於海隅則有王萑將榮宮槐常守祥擁帝梧瑞籠
堯柳玉盤仙掌金莖天酒梁高燕雀旗翻蚺鰐高呼兮市
地拜舞兮稽首捧絲綸兮千堆珠玉之輝鏘環珮兮一部
笙簫之奏受天之祐兮惟其有章何福不除兮俾爾單厚
猗歟休哉元首明股肱良庶績熙庶事康虞賔光於列位
呼韓厠於班行百寮濟濟萬國皇皇內自畿甸外被要荒
司儀之職無替臚人之列有章若川流之歸海猶湛露之

晞陽惟日征而月邁兮

一人有慶祝卜年而卜世兮萬壽無疆

正聲感人賦

以清明廣大五色成文爲韻
撫院取博學鴻詞試帖

天子省風聖人御宇旣攸敘兮九功復孔修兮六府擇吉日而合樂乃伶倫之俱舉雲門太簇咸池大呂太濩太韶大夏大武飭歸出滯兮用半用全崇德象功兮登三成五維時奏龍箏吹鳳笙鸞簫咽鼉鼓鳴矇眊入奏司樂載賡分刊節度實大聲宏晨露承雲燦龍樓之日麗朱弦疏越映鳳閣之花明遯休和於中天紀克諧於虞代獸舞鳳儀

臯賡禹拜維我

皇之至德邁前聖而尤最舞籥歌鐘兮奏以九成伐鼓摠
金兮宣於兩大佳氣兮郁紛響遏兮行雲雲和靈應琅璈
奇芬干羽修兩階之舞戈鋌靖萬里之軍旣從五降之節
遂成五色之文斯時也大地昭融芳晨晝朗昭德表功合
樂親往洞心駭目兮律呂清音虛已竦神兮笙竽逸響遞
奏豈二八繁弦非一兩輕塵已飛散游魚亦翻蕩將調露
以致和比鈞天而更廣爾乃八音繁會九變希聲播德留
兮

睿賞通靈協兮羣情和陰陽兮五音六律順天地兮六璽
五莖維暢中而動外斯激濁而揚清於是太和之氣出而

相值貞臣思奮賢士益飭爲國之良爲邦之直正直兮平
康剛克兮柔克休明兮鼓吹鴻猷兮潤色猗歟感人厥惟
正聲協五事麗五行宣九德布八絃用之邦國格於神明
以雅以南兮與七政而並用享親享帝兮共五禮以俱呈
無增悲而導欲乃情至而文生爰拜手而稽首祝久道而
化成

繼明照四方賦

學院取博學鴻詞試帖

兩儀垂象二曜著形羲輪隨轉望舒靡停麗天出地水氣
金精織阿旣潔陽德方亨弭節於場谷兮運渾儀而轉轂
照檻於搏桑兮應

聖主之神明維時出震繼離膺圖御世炎昊犧軒雲師火
帝仰觀俛察兮合璧重輪齊政窺璣兮懸車頓轡鳧飛騏
步兮旣倍顯其晶華顧兎蟾蟾兮亦尤呈其光麗惟睿作
聖惟德參天陰闔陽闢動直靜專感而後應兮采移華耀
言而後行兮光照珠連成器致用兮不遺乎寸晷容民畜
衆兮克肖於張弦九德旣備四時咸宜三綱攸綜萬物恬
熙窮神知化兮共耀靈而並麗體信達順兮與朱明而同
規遂乃遠及山陬遙通海嶠參贊兩大整齊八表東漸西
被兮無非翹首之歌朔易南訛兮大有含哺之貌洵俊德
之克明乃無微之弗照至於師師鷺序肅肅鴈行常依覆

情得覲焜煌若葵心之向燠猶湛露之晞陽他如雕顏卉
服侯甸要荒俱承煦育胥受容光寥遠月氏之國迢遙日
出之鄉皆因風而受吏盡重譯而來王信太平之有象正
化日之舒長惟照臨於九宇以表正於萬方

移家賦 并序

粵以癸丑之年建寅之月農祥晨正女夷鼓歌余乃身辭
鄉關奔馳道路晏嬰爽塏先君所置燒杵掘金任其易主
百里駕此艤艇一日達於白下土云信美客終異人阮籍
之哭窮途肆彼猖狂楊朱之泣岐路悲其南北昔陸士衡
之入洛衛叔寶之過江俱以國常非由得已梓家本膏華

性耽揮霍，生值承平之世，本無播遷之憂。乃以鬱伊既久，薪纒成疾，梟將東徙，渾未解於更鳴。鳥巢南枝，將竟托於戀燠。烟寒土鏗，仲蔚之居盡蓬蒿。月冷繩牀，陳平之門惟敝席。心妍面醜，力薄才綿。紫綬豈療愁之花，丹棘非忘憂之草。饑者歌食，勞者歌事。覩縷懼荒，耗之譏忤。悒盡侘傺之況，嘆老嗟卑。思來述往，御爐宮錦，舊事銷沈。葛帳西華，故交零落。汜騰財散，聊自適於琴書。賈島詩窮，復何心於薪米。相如滌器，爐邊有娉婷之女。景畧鬻畚，山中遇蹒跚之翁。誅茅江令之宅，穿徑謝公之墩。烏衣巷口，燕子飄零。白板橋邊，漁舟暖晒。苦殷薑紫，淒涼何代江山。斷碣繚垣。

寂歷前朝陵樹。簾開晝永。雀作嘉賓。戶冷宵澄。魚爲門鑰。具崔洪之癖。不言貨財。讀潘尼之詩。易遺尺璧。遂乃笙簧。六藝漁獵百家。有若之惡。卧焮之以掌。蘇子之屈首。刺之於股。坐蕭藻之牀。書帙蠹希。映孫康之雪。爐香鳴困。林宗不改其樂。痾僂用志不分。竟同元豹。任終隱以無傷。轉慚蝨蠖。能負財以至死。雖無揚意之薦。達之天子。桓譚之賞。傳於後人。優哉游哉。聊以卒歲。蛟入仲舒之懷。鳳吐子雲之口。柴翰列元中之名。別館著紫方之號。金陵玉海。連城足比。秃友。退鋒。成功可期。千戶之侯。百工之技。天不予梓也。而獨文梓焉。追爲此賦。歌以永言。悲切怨憤。涕垂流沫。

賦

左思之賦覆醬醃置其然乎李賀之詩投溷中是吾憂也

我之宗周貴裔久發軔於東浙

按族譜高祖爲仲雍九十九世孫

有明靖

難用宣力於南都

遠祖以永樂時從龍

賜千戶之實封邑六合而剖

符迨轉弟而讓襲歷數葉而遷居

始祖諱轉弟公自六合遷全椒

值前代

之中天正太和之宇宙隸淮南爲編氓勤西疇以耕耨隕

榮露而脂凝合蕭雲而車覆春畝青連芳郊綠繡鷓鴣而

擻擻鏹揮蟀吟而軋軋織就艤舟於蔡姥湖邊扶杖於丁

姑祠右

蔡姥湖見全椒志丁姑祠見搜神記

爰負耒而橫經治青囊而業醫

鬼與區以爲友僦貸季以爲師翻玉版之精切研金匱之

奧奇德則協於仁恕知則達於神示聰明理達淳良廉潔

高祖

吳師志十一

道遺金而不拾牆有桃而詎折

先世還金事至
今鄉里皆稱之

講孝友於

家庭有代傳之清節信作善之必昌乃誕降於高祖自束
髮而能文及勝衣而稽古紹絕學於關閩問心源於鄒魯
夢丹篆而能吞假采毫而不與清麗裕綵疏越朱弦風行
水上繁星麗天初奮發於制舉仍追逐於前賢仲舒無窺
園之日公美無出墅之年遭息鬻而垂翅遽點額而迪邈
夜珠之光按劍泣玉之淚如泉煖風晴日張樂花前望龍
門而不見燒虎屍而茫然席帽隨身番瓊蓋骨躬耕而田
病磽确轉徙而財難薛越貧居有等身之書千時無通名
之謁

寧國太守關驥
以書召謝不往

時呵壁而問天遂舉觴而喝月種白

曾祖

吳兩縉

壬辰進士

祖

揚於蕭齋感黃槐於林樾隴上鳥飛花間鶯歌流水潺湲
寒山硯瓦無不傷遲暮於美人白盈顛之華髮乃守先而
待後開講堂而雜誦歷陽百里諸生游從鳥啼花影馬嘶
香鞞邁軸之寤寐言趾離之告吉夢見神物之蜿蜒占大
璋之載弄高祖夢神物而太史黃門肇生肇錫之以嘉名命王家而作棟
於是駒齒未落龍文已光始則河東三鳳終則馬氏五常
或篤志於鉛槧或盡力於農桑曾祖兄弟五人四成進士一爲農終布衣尋桑
根之遺跡過落葉之山房家有逸民之號人傳導引之方
東華遺俵閬苑翻觴落次仲之鬻逐簫史之凰布衣公無疾而終人
傳仙伯則遨遊薇省叔則棲遲槐署季抗疏於烏臺受兩
去

比處先人

常是他的祖

行三

朝之眷顧。似子固兄弟四人。吾先人獨傷晚遇。常發憤而
揣摩。遂遵道而得路。三殿臚傳。九重溫語。官燭宵分。花磚
月午。張珊網於海隅。懸藻鑑於畿輔。詔分玉局之書。渴飲
金莖之露。羨自首之詞臣。久赤墀之記注。五十年中。家門
鼎盛。陸氏則機雲同居。蘇家則軾轍並進。子弟則人有鳳
毛。門巷則家誇馬糞。綠野堂開。青雲路近。賓客則輪轂朱
丹。奴僕則繡駟妝靚。卮茜有千畝之榮。木奴有千頭之慶。
宅爲因舊。齋號長梁。禽鳴變柳。燕寢凝香。故物唯存於簪
笏。舊業不繫於貂璫。謝棊子之方褥。去班絲之隱囊。紗帷
畫煖。素琴夕張。圖史與肘案相錯。綺襦與軒冕俱忘。聽呂

字不次

字是

字通符

蒙之巽語過張中之墨莊鼎文有證謬之辨金根無誤改
之傷羨延陵之罍子擅海內之文章吾父於是仰而思坐
以待網羅於千古從橫於百代爲天下之楷模識前賢之
紀載實文苑之羽儀渺滄海之流芥元默以爲稼穡洪筆
以爲鉏耒獨正者危至方則闕九州之被有餘三秀之門
斯壯雕蟲而恥壯夫棄觚而歎散儒講學鄒嶧策名帝都
摩石鼓之文聽圓橋之書當捧檄之未決念色養之堪媿
感蔡順之噬指鄙溫嶠之絕裾網蒲葦而織屨履澣厠踰
而滌溺器菽水堂前板輿花裏見孝草之敷榮有慈鴉之
戾止六芝競進以延年五采戲前而色喜曾參之心樂三

金趙槩之母年八十身隱而文焉用善養而祿弗及方遂
茅容之願。遽下臯魚之泣。肝乾肺焦。形變骨立。白蛇素狸
之擾。皓鳥曠雀之集。凡見似而日瞿。皆隱志之相及。喪葬
既畢。精業維勤。卷之萬象。揮之八垠。守子雲之立安。黔壤
之貧。觀使才於履屐。作表帥於人倫。郗成分宅之羔羊舌
下泣之仁。門堪羅鳥。庭無雜賓。揮樂廣之塵。書羊欣之裙。
馬帳溢執經之客。鹿車駢問字之人。暮年賢舍遠在海濱。
時矩世範。律物正身。時游歷於緇帷。天將以爲木鐸。繫馬
堂階。衣冠萬彙。鮭菜蕭然。引觴徐酌。春夏教以詩書。秋冬
教以羽籥。烏葦聳飛。雲蔓連閣。見橫舍之既修。歌泮水而

竹字玄事
凡外史

思樂

先君爲巖榦教諭捐貲破產修學宮

凜朽索之馭馬每求信於尺蠖守

規矩與繩墨實方員而柄鑿微子之歎蓬飛仲尼之感桑

落歸耕穎上之田永赴遂初之約

先君於壬寅年去官次年辭世

賢人則

歲在龍蛇仙翁則惟遺笙鶴於是君子之澤斯於五世兄

弟參商宗族詬誶假蔭而帶狐令賣婚而締雞肆求援得

援求繫得繫侯景以兒女作奴王源之姻好唯利販鬻祖

曾竊貲阜隸若赦之鬼餒而廣平之風衰矣彼互郎與列

肆乃販脂而削脯既到處而輒留能額瞬而目語魚鹽漆

絲齒革毛羽涇嘉舉穆駟僧枝梧漉沙搆白熬波出素積

雪中春飛霜暑路遷其地而仍良皆雜處於吾土山操人

面窮奇鋸牙。細旃廣厦。錦幄香車。馬首之金匱。巾腰間之玉辟邪。春風則乘醉而倚。秋月則倍明於家。簪之列戟。鳴珂。加以紫標黃榜。莫不低其顏色。增以懷愴。口噤嚙而不前。足盤辟而欲往。念世祚之悠悠。過斯人而怏怏。梓少有六甲之誦。長餘四海之心。推雞坊而爲長。戲鶯欄而忿深。嗟早年之集蓼。託毀室於宛禽。淳于恭之自錐。不見陳太邱之家法。難尋熏爐茗椀。藥臼霜碓。竟希酒聖。聊托書淫。旬鍛季鍊。月弄風陰。談諧不爲塞默。交游不入僉壬。爾乃洛陽名園。輞川別墅。碧柳樓臺。綠苔庭戶。羣鶯亂飛。雜花生樹。枕石激流。研朱滴露。有塊意與琦行。無捷徑以窘步。

吾獨好此媿修，乃衆庶之不譽。賀拔甚之交疏，劉鶴鶴之
門杜。羣疑臭臭，有似墨尿。齟齬齟齬，耻耻棲棲。無爲牛從，
寧爲雞尸。灌夫罵坐之氣，莊叟物外之思。壯士歎兮絕天，
維北斗戾兮太山夷。閉戶而學書空，叩門而拙言辭。至於
眷念鄉人，與爲游處。似以冰而致蠅，若以狸而致鼠。見幾
而作，逝將去汝。飄瓦而伎心不怨，虛舟而偏心不怒。買絲
五色，繡作平原君。有酒一杯，唯澆趙州土。當其年少旅愁，
東下西游，向臨邛以作客。過鄴下而登樓，馬鳴驛路，雞唱
星郵。嚴霜點鬢，酸風射眸。鼠窺燈而破夢，鳥嘯樹而生愁。
月曉則溪林索索，葉落而古道颼颼。風力酒水，寒威綿折。

行道遲遲憂心惓惓日薄西山乍明乍滅有迷津而莫問
無幽事之可悅樂莫樂兮新相知悲莫悲兮生離別看山
光而黯淡聽水聲而嗚咽既而名紙毛生進退維谷歎積
案而成箱亦連篇而累牘雖濬發於巧心終受畎於拙目
鬼嗤謀利之劉龍人笑苦吟之周朴竟有造請而不報或
至對賓而杖僕誰爲倒屣之迎空有溺廬之辱撥寒爐之
夜灰向屠門而嚼肉五世長者知飲食三世長者知被服
彼錢癖與寶精枉秤珠而量玉遂所如而齟齬困窮塗而
瑟縮金陵佳麗黃旗紫氣虎踞龍盤川流山峙桂槩蘭舟
藥欄花砌歌吹沸天綺羅撲地實歷代之帝都多奢人之

旅寄爰買數椽而居遂有終焉之志樓外花明簾前日麗
竹院風清紙牕雪霽常捫蝨而自如乃送鴻而高視弔六
代之英才忽愴焉而隕涕彼夫金張之館許史之廬南鄰
鍾磬北里笙竽有萬人之僮客具千乘之輜車生奇樹於
庭內待時英而館虛久從吾之所好豈有慕於彼都乃有
青錢學士白衣尚書私擬七子相推六儒既長吟而短嘯
亦西抹而東塗咸能振翼於雲漢俱誇龍躍於天衢誰解
投分之交懼誦絕交之書於是登高舒嘯臨流賦詩朝露
之托柏葉枯朽之出菌芝世事則唯感木槿文字則竟少
萋蕤澆書攤飯朝斯夕斯况復廻文織錦故人織素鬢影

春風縞衣茹蘆垂露華於石井彈綠綺而佳趣不工封禪
之書聊作美人之賦別有何哉自首車子青春紅紅小妓
黑黑故人寄閒情於絲竹消壯懷於風塵識沈約夢中之
路銷江淹別後之魂謙以稱物而平施忍以含容而成德
石火電光終於此滅取富貴以何時嗟韶年之轉迫且夫
消息盈虛天道壯焉余家世於淮南乃流播於江關枯魚
窮鳥不可問天布衣韋帶虛此盛齒寄恨無窮端愛詎止
憶風景之通華寫哀思於側理妙曲唱於旗亭絕調歌於
郢市正如雍門之琴聞而淚落無休素女之瑟聽則悲生
不已

文木山房集目

詩一

觀海

西墅草堂歌

雨

遺園四首

雜詩

病夜見新月

小橋旅夜

風雨渡揚子江

殘春僧舍

笙

琵琶

早春過冶山園亭追悼周羽士

楊柳曲送別沈五遂初

寄懷章裕宗二首

寄李慵村四首

登周處臺同王溯山作

春興八首

古意

冶城春望

過金舅氏五柳園舊居

永慶寺

過叢霄道院

滁州旅思

九日約同從兄青然登高不至四首

石城晚泊

渡江

望真州

訪楊東木敷五

不寐

將往平山堂風雪不果二首

月

賦得秘殿崔嵬拂綵霓

賦得雲近蓬萊常五色

賦得敦俗勸農桑

題王湖山左茅右蔣圖

寒夜坐月示朱草衣二首

雪夜懷王湖山山居二十韻

丙辰除夕述懷

元夕雪

題史鐵力竹牕夜坐圖二首

輓王宓草

沈五自中都來自下旋復別去悵然有作

全椒道上口占六首

閒情四首

文木山房集

全椒 吳敬梓 敏軒

詩一

觀海

浩蕩天無極，潮聲動地來。
鵬溟流隴域，蜃市作樓臺。
齊魯金泥沒，乾坤玉闕開。
少年多意氣，高閣坐銜杯。

西墅草堂歌

先人結廬溪山中，布衣蔬食一畝宮。
青山層疊列畫障，綠樹槎枒映簾櫳。
門迎流水蓼花灣，牧唱樵歌競往還。
琴樽無恙塵囂靜，指點溪林莫靄間。
有明未運干戈裏，黃巾赤

眉紛如蟻淮南十家九家空眼看城郭生荆杞先人倉皇
走避兵茅屋傾敝茂草生汗菘滿目牛羊下野水爭流禽
鳥鳴五十年來成幻夢斜陽廢墅少人行吾先君子長太
息欲將舊宅重經營手持錢帛告田父昔吾先人此環堵
多年侵奪勿復言梁燕飛來知故主茅茨重翦土重築醜
酒諸昆共揮麈竹苞松茂好相期莫忘先人慶寧宇祇令
搖落又西風一帶楓林繞屋紅明月空傳天子詔

西墅一
輪明月

高擬鹿門莊烈
皇帝勅書中語

歲時瞻仰付村翁

雨

輕暖卷簾衣孤亭暮雨微
落紅辭密樹新綠滿遙扉
堦下

苔痕長，梁間燕子歸。西牕燈影暗，枯坐欲忘機。

遺園四首

辛苦青箱業，傳家只賜書。荒畦無客到，春日閉門居。柳綠和烟結，梅根帶雨鋤。舊時梁上燕，渺渺獨愁予。

新綠漸成陰，催耕聞暮禽。治生儒者事，謀道古人心。薄俗高門賤，窮途歲序深。無聊愛墳籍，詎敢說書淫。

秋聲何日到，殘暑去天涯。鴟影校烟樹，松陰繪月階。病魔皆故物，詩境落孤懷。獨倚危樓望，清光聚此齋。

風雨漂搖久，柴門挂薜蘿。青雲悲往事，白雪按新歌。每念授書志，其如罔極何。可憐貧賤日，祇是畏人多。

雜詩

鴻雁鳴雝雝白露淒以隊大夫用爲贄德與長者配或謂
之鳴鵝南遊青春背况乃上虞縣民力遂可廢春銜拔草
根秋啄除其穢悵焉忽單飛孤鳴中腸碎傷彼水中鳩關
關和其喙

初夏村居羅錦宣攜樽過訪賦謝

風雨彌旬久晴天一啟扉客攜樽酒至驚亂林鳥飛刺水
秧針瘦霑人柳汁肥江東老羅隱明月送將歸

病夜見新月

一痕蟾光白晝殘空庭有人病未安暮禽辭樹疑曙色影

落文牕移琅玕無聊盡日秋聲
飛露重羅衣玉骨寒欲攀
仙桂問月姊老兔深藏不死丹
仰天長嘯夜氣發絲絲鬼
雨逼雕闌

小橋旅夜

客路今宵始茅檐夢不成蟾光雲外落螢火水邊明
早歲艱危集窮途涕淚橫蒼茫去鄉國無事不傷情

風雨渡楊子江

幾日秣陵住扁舟東復東濃雲千樹合驟雨一江空
往事隨流水吾生類轉蓬相逢湖海客鄉語盡難通

殘春僧舍

花落迴廊靜鐘聲丈室過三春青鬢改一院綠陰多客久
無鄉夢愁深有病魔獨憐良夜永明月在藤蘿

笙

數聲鶉管絳脣乾撥火金爐夜向闌孺子獨生伊洛想仙
娥曾共幔亭看幾時天上來青鳥何處風前聽紫鸞最憶
澄心堂裏曲小樓細雨十分寒

琵琶

鳳尾龍香世莫傳半灣沙邏繫冰弦雪深六月明妃冢淚
滿三更商婦船坐嘯竹林差共擬重登花萼亦堪憐鬱輪
袍曲非難製祇是無因上舞筵

早春過冶山園亭追悼周羽士

晴光冉冉過樓臺
仄徑捫蘿破蘚苔
仙客已歸蓬島去
名園仍向冶城開
獨憐殘雪埋芳草
又見春風綻野梅
十載知交存此地
祇今寥落不勝哀

楊柳曲送別沈五遂初

江南二月春風吹
江邊楊柳千萬枝
行人欲折不忍折
籠烟蘸雨垂綠絲
王恭張緒不可見
困酣嬌眼如欲啼
攀條流涕桓宣武
何不移栽元武陂
昔日幽燕輕薄兒
斫取柔條繫斑騅
越溪春半如花女
襖袂牽裳憐愛誰
羌管聲中傷別離
聲聲寄我長相思

寄懷章裕宗二首

柳烟花雨記春初夢斷江南半載餘直到東籬黃菊放故
人才寄數行書

香散荃蕪夢覺遲燈花影綴玉蟲移分明攜手秦淮岸共
唱方回腸斷詞

寄李肅村四首

帶雨征鴻過晚天懷人中酒夜無眠小山叢桂今安在欲
賦淮南招隱篇

鄴侯風骨謫仙狂白下空臺咏鳳凰好佩茱萸食蓬餌菊
英滿泛九霞觴

飄零身世同秋雁寂莫郊垞狎野賓浪說吳剛能斫桂無
由得見月中人

修竹千竿酒百罇華林江左舊名園共君相約年年醉世
上升沈安足論

傷周羽士

豈是黃金不鑄顏剛風浩劫又吹還月明笙鶴縵山頂歸
向蓬萊第幾班

登周處臺同王溯山作

高臺多春風旭日照彼岨攬袂試登臨懷古遙踟躕昔者
周孝侯奮身三惡除家本番畫溪折節此讀書古今同一

轍與君皆僑居工愁吳季重深情王伯與抗志慕賢達悠
悠千載餘

春興八首

秦淮三月水芳草綠迴汀樓外鶯梭轉牕前漁榜停午烟
隨處滿卯酒未曾醒花事知何許柴門竟日扃

移居星歲易爲愛白門山邃步連花港蘭舟繫柳灣窺檐
宿雀去繞樹暮鴉還長晝茶鐺沸耽吟亦解顏

失計辭鄉土論文樂友朋爲應蓬自直聊比木從繩揮塵
清風聚開樽皎月澄迴思年少日流浪太無憑

但覺黃金賤其如白璧珣纏頭當日價乞食近年詩顧曲

窺園者仲舒
一可不通

周公瑾呼盧劉穆之歡場無限事猶自繫相思
興來凭水檻豈是好樓居者酒稽中散窺園董仲舒閒情
時有作消渴病難除一事差堪喜侯門未曳裾

小牖通潮信春風羨碧流玉簫聲斷續銀蒜影夷猶北里
尋商女南朝問故侯銜泥雙燕過落日水明樓

近市居原誤無由學灌園誅茅江令宅蠟屐謝公墩漫畫
終何益寒號亦自存每將偕隱意三復昔人言

積雨朝來霽垣衣上板橋春光自明媚客思轉蕭條柱按
鴟弦劇杯傾鵲腦消殘燈高枕夜夢裏故山遙

古意

妾年十四五自矜顏如花靡容翳鮫綃膩理覆蟬紗耳瑤
垂明月臉暈凝朝霞黃金飾釵纛碧珠綴鬢鴉寒帷當戶
坐皎皎燦天葩麝火博山然雲母屏風遮女師勤鍼繡侍
婢理箏琶母兄命良媒交口稱柔嘉自緣根本好那復委
泥沙豈知盛年去空闔自長嗒五陵輕薄兒紛紛鬪驕奢
遂言鄰女美棄妾不復誇含羞臨曉鏡恐似鳩盤茶

冶城春望

鑄劍池臨古道旁忠貞祠墓枕平岡雨餘圓蘚生虛壁風
過長松倚壞牆建業三春花事好句吳千載霸圖荒衣冠
晉代渾難問獨凭高原空夕陽

過金舅氏五柳園舊居

紅土山前柳色深幾年悽愴在江海養花天氣春寒淺
易主亭臺往事沈瘴雨蠻烟悲宦况舅氏爲廣西修仁令菴絲蝸篆尚
庭陰廻思睹墅圍碁日寂莫羊曇淚滿襟

永慶寺

桃花紅映上方時蠟屐登臨有所思昔日主家羅綺盛寺相傳爲梁永慶公主香火祇今佛地繡緡垂拓提夜雨寒茶竈店舍春

烟颺酒旗盡日小樓貪習靜浮屠倒影壁間移

過叢霄道院

康熙丙子歲先君子讀書其中今道士尚存年九十餘矣

鈴鐸風微靜不聞客來芳徑正斜曛烟昏樹杪鴉千點水

長陂塘鷺一羣幽草綠遙尋古剎疎牕碧暗哭遺文白頭
道士重相訪極目滿山飛亂雲

滁州旅思

曉望諸峯翠色新雨餘芳草碧如茵春光已過湔裙節勝
地渾無蠟屐人旅病那堪花入夢暮寒不厭酒霑脣遙思
二月秦淮柳蘸露拖烟委麴塵

九日約同從兄青然登高不至四首

盡日凭闌有所思夕陽不見野艇移牕前綠水紋如縠一
夜清霜減舊時

綠橙手擘味清嘉黃菊枝頭漸著花獨坐河亭人不到一

末三句
與陸中引
用

簾秋水讀南華

吾家才子推靈運，也向秦淮儻舍居。故國茱萸從插徧，登高作賦已全虛。

寒烟冪屋暗長橋，幾點漁燈趁晚潮。酤得鄰家新釀美，半爐麩炭火親燒。

秋病四首

女蘭香細揜牕紗，白袷單衣病裏加。一縷藥烟當水檻，寒蟬聲斷夕陽斜。

同作

蕪湖朱卉草衣

月影初臨樹影加，茶烟將斷篆烟斜。閒凭曲景闌干立

此即外史
牛衣。

一架秋風扁豆花

素領應隨秋氣深，却緣消渴罷彈琴。
美人一賦堪千古，何用子虛與上林。

當風怕看來賓雁，苦雨愁聞逐婦鳩。
不是鄰家遺潘沐，那能臨鏡強梳頭。

屯賤誰憐虞仲翔，那堪多病臥匡牀。
黃金市駿年來貴，換骨都無海上方。

石城晚泊

落日寒江上，吳艖挂短篷。
荻花連岸白，燭影傍人紅。
大澤眠鷗鷺，晴天響雁鴻。
焚香祝奇相，願借一帆風。

渡江

呼婦鳩聲水一涯
魚鱗猶恐尚風霾
凝兒不識波濤險
笑指船如水鞞鞣

望真州

波光駘蕩綠揚灣
漁市人家曬網還
日暮危檣依曲港
寒雲遮斷小帆山

訪楊東木敷五

相看鍛翮漫歌呼
羨爾龍文與鳳雛
買棹寒江冰欲合
連牀細雨酒頻酤
迴廊自署湯提點
長夜唯消木野狐
不是故人施榻待
扁舟風雪又菰蘆

不寐

客中眠未穩，漏鼓聽愈真。
月落烏辭樹，燈昏鼠近人。
酒痕滄病肺，詩卷伴閒身。
側耳碁枰響，因思王積薪。

將往平山堂風雪不果二首

平山堂畔白雲平，文藻偏能繫客情。
不似迷樓羅綺盡，祇今惟有暮鴉聲。

空懷遷客擅才華，不見雕闌共絳紗。
卻憶故山風雪裏，摧殘手植老梅花。

月

二分明月好，深夜自光輝。
玉兔白常滿，金猊香漸微。
車教

寒薦酒楸袖晚侵衣遙念青溪口凭闌盼我歸

賦得祕殿崔嵬拂綵霓

督院取博學
鴻詞試帖

長樂鐘聲啟天門羽仗齊深宮開戶牖祕殿儼榱題瑞靄
螭頭麝香烟鴟吻迷芝房含旭日藻井映晴霓楓陛多鳴
玉彤廷半執圭銀青來複道金紫向沙隄但覺層霄近還
疑弱木低紅梁纔語燕絳幘又鳴雞采色輝珠箔華光映
錦綈啣嬌鳥喚恰恰曉鴛啼率舞獸咸拜聯班馬正嘶
幾多詞賦客通籍在金闈

賦得雲近蓬萊常五色

撫院取博學
鴻詞試帖

龍樓朝日麗鳳閣瑞雲翔膚寸看初合觚稜倏已光氤氳

含絲仗黠黠映旂常白鶴春風滿輕鱗淑景長紀官宜殿
陛爲雨潤農桑五色兼三色千秋捧

聖皇

賦得敦俗勸農桑

學院取博學
鴻詞試帖

淑景堯封麗仁恩禹甸長辛勤看士女勸裸重農桑綠野
春如繡青郊草正芳畦邊揮黛耜陌上執懿筐蘭澤高低
徧蘋花遠近香和風來密樹甘雨溢方塘戴勝飛何急倉
庚語轉忙定將收爾稅紵待莠苞稂喜見趨耕織欣瞻裕
蓋藏陶詩堪入詠朋酒祝無疆

題王湖山左茅右蔣圖

平生我愛王摩詰
朝川圖畫妙入神
篋藏此圖三十載
晴牕拂拭無纖塵
有時酌酒與裴迪
花枝草色眼中新
浮雲富貴非所好
愛山成癖樂其真
披圖沈吟仍怏怏
朝川野色平于掌
那似江南烟水區
丹青紫翠多駘蕩
欽崙礧礧仍翻僧
崔嵬歷陵人觀仰
白門佳麗古所稱
誰其峙者茅與蔣
幾年卜築板橋住
秦淮水色鍾山樹
木蘭舟內急觴飛
楊柳樓邊歌板度
著書仰屋差自娛
無端擬獻金門賦
授簡曾傳幕府招
蠟言梳貌還枝梧
秋風襍被返白門
牕外寒潮退舊痕
咄嗟獨凭闌干立
長者叩戶笑言溫
手持絕妙倪迂畫
畫出逍遙莊叟園
短松少鶴相隨久
修竹啼

鷲古意存兩山翠色烟雲繞中有草堂深窈窕書卷應堪
比鄴侯樵蘇時復思莊躋幾稜欣看遠近田一條寒玉溪
光曉春秋佳日快登臨高懷那許塵容擾雅志高懷見此
賢何須服食求神仙蘭臺家世千秋重藝苑文章四海傳
祇此蓬瀛共瑤島休言綠野與平泉便擬將身入圖畫不
羨王維居輞川

寒夜坐月示草衣二首

今夜霜中月依然照獨吟短簷窺野馬曲木礙歸禽但覺
情懷減其如歲序侵鄰家歌舞宴徹曉惱人心

忽念朱居士耽吟夜撚髭篆烟縈畫障漏水咽銅蟲蠹木

蟲何苦鑽牕蜂太癡何當一樽酒斟酌月明時

雪夜懷王溯山山居二十韻

十日不相見相思契轉深端憂多雪霰悵望好園林鍾阜
濃于染茅山翠欲沈垂繒看凜烈磐石積頑陰馬蝟嚴威
集鴉翎宿霧侵溼苔封薜戶空穴送霜砧織楚門將塞誅
茅路可尋田家新釀酒土室且孤斟肘後堆青簡牀頭枕
素琴定須攜寸管詎肯戀重衾紅樹酣荒店黃花辭故岑
玉蟲寒閃閃金虎夜悄悄鳳尾松堪寶龍絲竹似鉞天懷
原澹泊風物任蕭森不獨常披翰還宜愛盍簪扁舟良友
聚施榻故人心荆門躍舟
同在山莊絮語同揮塵攤書共識蟬歡娛

良不易離別感難禁
駮瘵撚髭苦凌兢
擁鼻吟言歸在何
日乞我辟寒金

乾隆元年
(1736)

丙辰除夕述懷

歲序倏云暮羣動日以迫
青帝將乘權玄冥又如客
寄居秦淮上五載星霜易
令節空坐愁北風吹牕隙
霸子俱跳蕩萊妻只羸瘠
商陸火添紅屠蘇酒浮碧
唯有虎宜畫那無雞可磔
指困復何人助予呼將伯
堪笑謝仁祖轉向修齡索
王湖山餽米入夜醉司命
噉辭多自責迴思一年事
棲棲爲形役相如封禪書
仲舒天人策夫何採薪憂
遽爲連茹厄人生不得意
萬事皆愬愬有如在網羅
無由振羽翼嚴

參看唐序。

霜覆我檐木介聲
械械短歌與長嘆
搔首以終夕

元夕雪

元夕三更後雪花飛滿天
全無明月影空有夜燈懸
詞賦梁園客肌膚姑射僊
何人金殿側簪筆祝豐年

題史鐵力竹牕夜坐圖二首

月牕跌坐有誰俱
夜色空明照白鬢
千畝渭川茅屋外
寒烟深處長王芻

江寧縣南二十里
簫管竹生慈母山
頭白歸來應卜築
風標常似畫圖間

輓王宓草

白鬢負人望今見玉棺成高隱五十載畫苑推耆英篋貯
宣和譜圖藏佛菽形九朽豈煩擬一筆能寫生毫端臻神
妙墨暈勢縱橫裴池抽玉躡觀者愕然驚懸金在都市往
往收奇羸幽居三山下江水濯塵纓牕前野竹秀戶外汀
花明揮手謝人世猴嶺空簫聲卿輩哀輓言或恐非生平
顧陸與張吳卓然身後名

沈五自中都來白下旋復別去悵然有作

金石同交誼相思涕淚流如何三載別不遣一宵留候館
迎征雁津亭聞暮鳩獨憐江上月雙照故人愁

全椒道上口占六首

山凹曉日上三竿
蘭渚停輿露未乾
乍煖已教衣擦絮
那知江店尚春寒

鳥健穩臥閉柴門
千樹桃花又一村
翻恨陽禽聲聒耳
春原無處不消魂

海燕初來塞雁歸
楊花風滿杏花飛
幾年白社疎行跡
老樹今成四十圍

榆甲雨過春水平
村原無復桔槔聲
年來料得多豐稔
墻角先看薺菜生

湔裙村女集方塘
釵釵波光間日光
爲聽竊脂枝上語
相邀同賽馬頭孌

舊水何堪飲社翁兼旬兀坐雨聲中因遇村舍知春盡漸
見含桃火齊紅

間情四首

娉婷市近苧蘿西倦客撥幽叩碧闈溪上桃花紅雨過
前楊柳綠陰低雖無美酒傾三雅尚有新詩咏九迷
鏡光私語處生憎滿院曉鶯啼

咫尺僊源緣分乖莫愁真合住秦淮因貪媚蝶收奩粉爲
愛游蜂集鬢釵飛絮落花三月暮綿繻甲帳片時借朱櫻
樹下重攜手看足明金壓繡鞵

甓娘年少泰娘嬌小別麻姑路已遙
牕蔽蛾眉看自在橋

排雁齒定魂銷繡墩春暖麟文席綵袖香籠鳳翼簫不是
梁清曾密約那能此處見雲翹

香熏透骨有誰知謫向塵凡冰雪姿晝永春殘人乍別態
濃意遠淚偷垂曾聞名士多寥落何事佳人亦此離安得
與卿登玉版大羅天上看書碑